

景明刻本古今逸史

四五

華陽國志卷第四

晉常璩著

明吳琯校

南中志

寧州晉泰始六年初置蜀之南中諸郡庾降都督治也南中在昔蓋夷越之地滇濮句町夜郎葉榆桐師
雋唐侯王國以十數編髮左衽隨畜遷徙莫能相雄長下永昌縣有雋唐縣周之季世楚威王遣將軍莊蹻泝沅水出且蘭以伐夜郎植牂柯繫船於是且蘭旣剋夜郎又降而秦奪楚黔中地無路得反遂留王滇池蹻楚

莊王苗裔也以繫船因名且蘭爲牂牁國分侯支黨傳數百年秦并蜀通五尺道置吏主之漢興遂不賓有竹王者興於遜水有一女子浣於水濱有三節大竹流入女子足間推之不肯去聞有兒聲取持歸破之得一男兒長養有才武遂雄夷狄以竹爲姓捐所破竹於野成竹林今竹王祠竹林是也王與從人嘗止大石上命作羹從者曰無水王以劙擊石水出今王水是也破石存焉後漸驕恣武帝使張騫至大夏國見邛竹蜀布問所從來曰吾賈人從身毒國得之身毒國蜀之西國今永昌是也騫以白帝東越攻南

越大行王恢救之恢使番陽令唐蒙曉喻南越南越人食有蒟醬蒙問所從曰牂柯來蒙亦以白帝因上書曰南越地東西萬里名爲外臣實一州主今以長沙豫章往水道多絕難行竊聞夜郎精兵可得十萬若從番禺浮船牂柯出其不意此制越之一奇也可通得夜郎道爲置吏主之帝乃拜蒙中郎將巴蜀兵千人奉幣帛見夜郎候喻以威德爲置吏旁小邑皆貪漢繒帛以爲道遠漢終不能有也故皆且聽命司馬相如亦言西戎邛笮蜀之後園可置爲郡帝旣感邛竹又甘蒟醬乃拜爲中郎將往喻意皆聽命後西

南夷數反發運興役費甚多相如知其不易也乃假巴蜀之論以諷帝且以宣指便於百姓檄文在本傳卒開棘門通南中相如持節開越雋按道侯韓說開益州武帝傳拜唐蒙爲都尉開牂柯以重幣喻告諸種侯王侯王服從因斬竹王置牂柯郡以吳霸爲太守及置越雋朱提益州四郡後夷濮阻城咸怨訴竹王非血氣所生求立後嗣霸表封其三子列侯歿配食父祠今竹王三郎神是也昭帝始元元年益州廉頭姑繒等二十四縣民反水衡都尉呂破奴募吏民及發犍爲蜀郡奔命擊破之後三歲姑繒復反都尉呂辟

辟胡擊之敗績明年遣大鴻臚田廣明等大破之斬首捕虜五萬人獲畜產十萬餘頭富埒中國封其渠帥亡波爲句町王以助擊反者故也廣明賜爵邑成帝時夜郎王興與句町王禹漏卧侯俞更相攻擊帝使太中大夫張斥特節和解之句町夜郎王不服乃刻木作漢使射之大將軍王鳳薦金城司馬蜀郡陳立爲牂柯太守何霸爲中郎將出益州立旣到郡單至夜郎召興興與邑君數千人來見立立責數斬興邑君皆悅服興妻父翁指與興子恥復反立討之威震南裔平帝末梓潼文齊爲益州太守公孫述時拒

郡不服光武稱帝以南中有義

按漢書述據益土齊固守拒險述拘齊妻

子許以封侯終不降聞光武卽位間道遣聞蜀平封齊成義侯

益州西部金銀寶貨

之地居其官者皆富及十世孝明帝初廣漢鄭純獨

尚清廉毫不犯夷漢歌詠表薦無數上自三司下

及卿士莫不歎賞明帝嘉之因以爲永昌郡拜純太

守章帝時蜀郡王阜爲益州太守治化尤異神馬四

匹出滇池河中甘露降白鳥見始興文學漸遷其俗

安帝永初中漢中陰平廣漢羌反征戰連年元初四

年益州永昌越雋諸夷封離等反衆十餘萬多所殘

破益州刺史張喬遣從事蜀郡楊竦將兵討之竦先

以詔書告喻告喻不從方略滌討凡殺虜三萬餘人
獲生口千五百人財物四十餘萬降赦夷三十六種
舉劾姦貪長吏九十人黃綬六十人諸郡皆平竦以
傷死故功不錄自是後少寧五十餘年迄靈帝熹平
中蠻夷復反擁沒益州太守雍陟遣御史中丞朱龜
將并涼勁兵討之不克朝議不能征欲依朱崖故事
棄之太尉掾巴郡李顥獻陳方策以爲可討帝乃拜
顥益州太守與刺史龐芝伐之徵龜還顥將巴郡板
楯軍討之皆破陟得生出後復更叛梓潼景毅爲益
州太守承喪亂後民夷困餓米一斗千錢皆離散毅

至安集後米一斗八錢建安十九年劉先主定蜀遣
安遠將軍南郡鄧方以朱提太守庾降都督治南昌
縣輕財果毅夷漢敬其威信方爲先主問代於治中
從事建寧李恢對曰西零之役趙充國有言莫若老
臣先主遂用恢爲都督治平夷縣先主薨後越雋叟
帥高定元殺郡將軍焦璜舉郡稱王以叛益州大姓
雍闔亦殺太守正昂更以蜀郡張裔爲太守闔假鬼
教曰張裔府君如瓠壺外雖澤而內實粗殺之不可
令縛與吳於是執送裔於吳吳王孫權遙用闔爲永
昌太守遣故劉璋子闔爲益州刺史處交益州際牂

柯郡丞朱提朱褒領太守恣睢丞相諸葛亮以初遭
大喪未便加兵遣越雋太守巴西龔祿住安上縣遙
領郡從事蜀郡常頎行部南入以都護李嚴書曉喻
閩閩荅曰愚聞天無二日土無二主今天下派分正
朔有三遠人惶惑不知所歸其傲慢如此頎至牂柯
收郡主簿考訊姦褒因煞頎爲亂益州夷復不從閩
閩使建寧孟獲說夷叟曰官欲得烏狗三百頭膺前
盡黑蠻腦三斗斲木構三丈者三千枚汝能得不夷
以爲然皆從閩斲木堅劙性委曲高不至二丈故獲
以欺夷建興三年春亮南征自安上由水路入越雋

別遣馬忠伐牂牁李恢向益州以犍爲太守廣漢王士爲益州太守高定元自旄牛定笮水多爲壘守亮欲俟定元軍衆集合并討之軍卑水定元部曲殺雍闐及士庶等孟獲代闐爲主亮旣斬定元而馬忠破牂牁李恢敗於南中夏五月亮渡瀘進征益州生虜孟獲置軍中問曰我軍如何獲對曰恨不相知公易勝耳亮以方務在北而南中好叛亂宜窮其詐乃赦獲使還合軍更戰凡七虜七赦獲等心服夷漢亦思反善亮復問獲獲對曰明公天威也邊民長不爲惡矣秋遂平四郡改益州爲建寧以李恢爲太守加

安漢將軍領交州刺史移治味縣分建寧越舊置雲
南郡以呂凱爲太守又分建寧牂牁置興古郡以馬
忠爲牂牁太守移南中勁卒青羌萬餘家於蜀爲五
部所當無前號爲飛軍分其羸弱配大姓焦雍婁爨
孟量毛李爲部曲置五部都尉號五子故南人言四
姓五子也以夷多剛狠不賓大姓富豪乃勸令出金
帛聘策惡夷爲家部曲得多者奕世襲官於是夷人
貪貨物以漸服屬於漢成夷漢部曲亮收其俊傑建
寧爨習朱提孟琰及獲爲官屬習官至領軍琰輔漢
將軍獲御史中丞出其金銀丹漆耕牛戰馬給軍國

之用都督常重用人李恢卒後以蜀郡太守犍爲張翼爲都督翼持法嚴不得殊俗和夷帥劉胄反徵翼以馬忠爲代忠未至翼修攻戰方各資儲羣下懼翼曰吾方臨戰場豈可以紓退之故廢公家之務乎忠至承以滅胄蜀賜翼爵關內侯忠在南柔遠能邇甚垂惠愛官至鎮南大將軍卒後南人爲之立祠水旱禱之以蜀郡張表爲代加安南將軍又以犍爲楊義爲參軍副貳之表後以南郡閻宇爲都督南郡霍弋爲參軍弋甚善叅毗之禮遂代宇爲監軍安南將軍撫和異俗爲之立法施教輕重允當夷晉安之及晉

世因仍其任時交趾不附假弋節遙領交州刺史得以便宜選用長吏令官和解夷人及適罰之皆依弋故事弋卒子在龔領其兵和諸姓晉以巴西太守吳靜在官數年撫卹失和軍司鮮于嬰表徵靜還嬰因代之泰始六年以益州大分南中四郡爲寧州嬰爲刺史咸寧五年尚書令衛瓘奏兼并州郡太康三年罷寧州置南夷以天水李毅爲校尉持節統兵鎮南中統五十八部夷族都監行事每夷供貢南夷府入牛金旃馬動以萬計皆豫作忿恚致校尉官屬其供郡縣亦然南人以爲饒自四子弟仕進必先經都

監夷人大種曰昆小種曰叟皆曲頭木耳環鐵裹結無大侯王如汶山漢嘉夷也夷中有桀黠能言議屈服種人者謂之耆老使爲主論議好譬喻物謂之夷經今南人言論雖學者亦半引夷經與夷爲姓曰遑耶諸姓爲自有耶世亂犯法輒依之藏匿或曰有爲官所法夷或爲執仇與夷至厚者謂之百世遑耶恩若骨肉爲其逋逃之藪故南人輕爲禍變恃此也其俗徵巫鬼好詛盟投石結草官常以盟詛要之諸葛亮乃爲夷作圖譜先畫天地日月君長城府次畫神龍龍生夷及牛馬羊後畫部主吏乘馬幡蓋巡行安

卹又畫牽牛負酒齋金寶詣之之象以賜夷夷甚重
之許致生口直又與瑞錦鐵券今皆存每刺史校尉
至齋以呈詣動亦如之毅後永昌呂祥爲校尉祥後
數人李廣漢從雲南犍爲郡守爲校尉久之建寧太
守巴西杜俊朱提太守梓潼雍約懦鈍無治政以賄
成俊奪大姓鐵官令毛詵中郎李督部曲致詵弟耐
罪朱提大姓太中大夫李猛有才幹弟爲功曹分當
察舉而俊約受都尉雷逢賂舉逢子炤孝廉不禮猛
猛等怨之大安元年秋詵督猛逐俊以叛猛遺之書
曰昔魯侯失道季氏出之天之愛民君師所治知足

下追踵古人見賢思齊足下箕帚枉慚吾郡亦逐約應之作亂衆數萬毅討破之斬詵首督走依遑耶五茶夷帥于陵承猛箋降曰生長遐荒不達禮教徒與李雄和光合勢雖不能營師五丈略地渭濱冀北斷褒斜東據永安退考靈符晉德長久誠非狂夫所能干輒表革面歸罪有司毅惡其言遂誘殺之行部永昌從事江陽孫辨上南中形勢七郡斗絕晉弱夷強加其土人屈塞應復寧州以相鎮慰冬十一月丙戌詔書復置寧州增綱牂牁益州朱提合七郡爲刺史加龍驤將軍進封成都縣侯二年于陵承詣毅請恕